

ki te whakakotahi i nga mahara me nga mahi mo ia tangata mo te iwi, me te motu katoa.

Te whare moenga o Te Tairawhiti ko Waitara-nui-a-Ngarue. Ko Tamawahine te whare kai, tetahi whare atahua, whakamiharo hoki, tae atu ki nga mahi o roto, Te "Dining Room," Store Room, Kitchen, Pantry, Butcher, me nga Boilers e whitu, tae ki te Engine Room. Tino pai, kaore hoki i ko atu!

Ka mutu nga korero. Haunga ia nga manaaki, Kanui te whakamoemiti mo nga manaaki. Te teepu nga kai te marae, te whare kai, nga kupu poroporoaki kei te mihi! Mihi ake nei. No te 19 o nga ra ka haere atu te ope ma Mokau ki Ngaruawahia.

AUE

Haramai e Te Minita
Mo nga Mahi Maori
Ki roto o Taranaki
Kia kite i taua inawa.

Ko Mei rawa te marama
I haramai ai a Ngata
Ki roto i Taranaki.
Ki Te Raukura ehinawal

No wai te tapuwae
Ka haruru kei Taranaki?
No Te Tairawhiti
Tika mai nei taua inawa!

Haere mai e Te Motu,
Takahia mai Taranaki
To 'kupu' e Te Raukura.
E hui ai maua inawa!

NGA HUI MAORI.

Ka tae te Minita mo te Ora (Hon. Mr Stallworthy) ki te takiwa o Ngati-Porou ka korero nga pakeha o reira ki a ia i ta ratau whakahe ki te putuputu o te haere a Ngati-Porou ki nga hui Maori, ka pau nui a ratau moni, ka mahue nga mahi, ka moumou nga ra tika mo nga mahi. Na, ka tukua mai e taua Minita aua whakahe ki te Minita Maori, ki a Ta Apirana Ngata.

Ko nga hui i whakahengia nei e nga pakeha o te Tairawhiti ko te hui ki te Wairoa i te 17 o nga ra o Hanuere, ko te hui ki Ngaruawahia i te 15 o nga ra o Maehe. I roto i aua wiki e hia ranei nga hui reihihoiho a te pakeha i tu ki nga wahi katoa o nga motu e rua; nga hui a ona ropu mo ia take mo ia take i tu ki nga wahi katoa. Kaore rawa i rangona he whakahe ma nga Maori mo te nui rawa o nga moni i pau ki aua hui, i rukerukea ranei ki tera takaro ki te reihihoiho. Kaore hoki he whakahe mo te whakahuihui a te pakeha ki etahi wahi kororerero ai i nga tikanga hei painga mo ratau. Heoi nana i wehewehe nga momo hui nei na nga pakeha etahi, na nga Maori noa etahi.

He aha nga hui Maori i whakahengia nei? Ko te hui ki te Wairoa i karangatia e Ngati-Kahungunu o te Wairoa kia tae atu a Ngati-Porou ki te awhina i a ratau ki nga mahi i kiia ai e te pakeha hei mahi tika ma te Maori, ara te mahi paamu.